

12092001







12092001







me lauft immr gradus.
me meint, es sig flach,
doch s goht immr ehli ufe.
wägedäm isch s so
 aschträngend.





+	+	+	+	+	+
+	+	+	+	+	+
+	+	+	+	+	+
+	+	+	+	+	+
+	+	+	+	+	+
+	+	+	+	+	+
+	+	+	+	+	+
+	+	+	+	+	+
+	+	+	+	+	+













jez han i s kaputt gmacht.
ha s eifach vrschlisse.
ha s so lang brucht,
bis es hi gsi isch.

obwohl i gwusst ha,
wie verhindere.

ha immr dänkt:
das giengi scho.

bis es hi gsi isch.





abgrund.

dört vorne isch dr abgrund.
dört vorne isch mi abgrund.
und langsam lauf i uf di zue.

niemer hebt mi. also lauf i.
witr. immr witr.


i weiss nit, won i bi.
blib stoh.
abr in weli richtig?

also lauf i. witr.
immr witr. wäg vo mir.
zu dir.

bisch du no obe?
bin i scho unge?

wiso isch s so schtill?
wiso redet niemer mit mer?
isch denn dört nie öppr gsi, wo
wo mi hebt.
ussr i.








hör uf weh mache.
hör uf!

i cha nümm.
i wott nümm.
schalt s ab!

es längt mer.
i mög nümm.
s isch z schwer.
nimm s wägg!

du bisch z schwer für mi.








du bisch schterkr als i.
i gib s zue.
ha kei luscht meh so z tue
als öb.
du behandlisch mi wie dräck,
will i di loh.
wie lang no?
hoffentlich no lang.
i ha di doch gärn
und du nützlich das us.
will du mi au gärn hesch.
abr nit wirklich.
entscheid di emol!
abr seisch mer d antwort nit.
i bi vill schwächer als du.
und du weisch es.



i bi schterker als du.
du gisch s zue.
hesch kei luscht meh so z tue
als öb.
i behandle di wie dräck.
will du mi lohsch.
wie lang no?
hoffentlich nümm lang.
du hesch mi no gärn
und i nütz das us.
will i di au gärn ha.
abr nümm wirklich.
entscheid di emol!
i ha dr dr d antwort gseit.
du bisch vill schwächer as i.
und i weiss es.








am liebschte würd i
oich alli umbringe.
und mit mir fang i a.







i iss mi schnäller,
als i wachse cha.








i han e fahne ufghänkt.
an höchschte mascht.

i weiss nit, was druf isch.
s isch z dunkel.

abr si het so guet gschmeckt
und isch so fin gsi.







es brennt liecht
im dritte ~~sch~~ schtock vis-à-vis.


i bi widr dehei.

sogar mis pyjama
seit widr hallo.

alles redet mit mer.
alles seit mer öppis.
im dritte schtock vis-à-vis
brennt liecht.

zum erschte mol
brennt liecht.





lanze

und i lauf
wie ne säier
vrteil i s bluet
uf de fälder
und us jedem tropfe
wachst e pflanze.








es rägnet
uf alles, wo ois lieb isch
und au uf das, wo nit.

es rägnet,
wenn mir laufe in de schtrose
und alles wird pflotsch nass.

es rägnet äsche.
vo all däm, wo mir use löh,
vo däm wo mir vrgüde.








mir läbe nie.
mir stärke ewig.








s liecht isch widr do.
es isch widr ganz nöch
bi mir.

abr nie gnue nöch,
dass i s packe cha.

dass es bi mir blibt,
dass i s bhalte cha.

i würd mer d finger verbrenne.








wie bin i numme so wit cho?
plötzlich bin i scho do.

bi doch vori grad
no dört hinge gsi.

und jez

i ha vrgässe,
won i schtoh blibe bi.







i bi so kabutt.

wär flickt mi?


wär sctoost mi in d garasch?

wär baut mini ersatzteil?

wär bringt se?

und wär zahlt das alles?








i sett öpis ufschribe.
abr s einzig won i cha,
isch d sohle vo mine schueh
aluege und gseh,
wie wit i scho gluffe bi,
nit wohi.








schwätze, dass gschwätzt.
schrìbe, dass gschrìbe.
läbe, dass gläbt.
schtärbe, dass gschtorbe.
tot si, dass gsi isch.








i wett alles ufschribe,
dass i s bhalte cha.
nit verlier.
nit vrgiss.
dass es bi mir blibt.
nit furt goht.
nüt furt goht.
mi nüt elei loht.
dass alli bi mir blibe.
niemer furt goht.
i nit elei bi.
nümm elei blib.








i ghör, was du seisch,
abr i vrschtoh s nit.
du redisch e fremdi sprooch.
i ha dr se bibrocht.







du hesch nümm welle.
i ha nümm chönne,
denn han i miesse.
was hätt i denn selle?







was han i denn gmacht,
dass i so bi, wien i bi?
was isch so schlimm?
i wird mit mir ~~g~~ gschtrooft.
du bisch, wie de bisch.
das isch schlimm gnue.








i cha alles mache, won i will.
was will i?
di.
chan i nit mache.








i vrschtoh d wält nit.
i vrschtoh mi nit.
wäge däm vrschtohn i oich;
dir vrschtöht au nüt.








i schrib immr s gliche uf:
i chumm nit drus.
i chumm nimm drus.
i chumm nie drus.
i chumm nit us mir use.







mi chopf isch so voll,
mis läbe so leer.

es isch niemer do,
wo mis läbe füllt
und mi chopf lehrt.





loh mi us

bitte bitte
loh d türe no ne schpalt uf.
mach se no ni zue.
bhalt se uf.
bitte bitte
loh no liecht ine
dur e schpalt.
e chli liecht.
bitte bitte
schliess nit ab,
mi nit i,
ois nit us.




bitte bitte
chumm zu mir,
i mis bett
und schlof mit mir-
i und us.
bitte bitte
i ligg wach,
schlof denn us.
du schlofschi,
wachschi denn uf.
ghei dr schlüssel no ni furt.
bitte bitte
blib bi mir.
und wenn du gohsch...
loh mi us.



bitte bitte
loh d türe no ne schpalt uf.
bitte bitte
nur e schpalt.
schliess nit ab,
drei nit um.
und vrlie dr schlüssel nie.
bitte bitte
loh d türe no ne schpalt uf.
e chli liecht
blibt bi mir.
dure schpalt luegsch mr zue,
wien i schlof
und gohsch.
lohsch d türe no ne schpalt uf?
bitte bitte





a und ab

löschi di ab.
mach mi a.
leer benzini
i mi chopf.


schnid di a.
hau nit ab.
nimm mis mässer
schnid mi uf.

luegi mis bluet, .
es glänzt rot.
luegi es schnuuf.
mit jedem zug
wird s no dünkler.

luegi es glänzt
wie ne lüchturm.
löschi nit ab.
löschi mi us.

luegi mi a.
luegi nit ab.
luegi i brenn
wie ne lüchturm.
und goht s liecht ab,
bischi du a.











nr.:

texte, zeichnungen und verlag:
christian mueller 2008

+41 76 587 07 81





